

Sanaartornermi neqerooruteqartitsisarneq pillugu Inatsisartut inatsisaat

Kapitali 1

Atuuffa

§ 1. Sanaartugassat suliarineqarnissaannut, imaluunniit sanaartugassat pilersaarutitalerlugit suliarineqarnissaannut neqerooruteqartitsisarnermut, aammalu suliaakkiissutinik tunniussisarnermut inatsit atuuppoq.

Imm. 2. Neqerooruteqartitsisartunut ukununga inatsit atuuppoq:

- 1) Namminersorlutik Oqartussat, ingerlatseqatigiiffiit Namminersorlutik Oqartussanit aalajangiisarnikkut sunniuteqarfigisinnaasaat kiisalu kommunini oqartussaasut,
- 2) Neqerooruteqartitsisut allat, pisortanit tapiiffigineqarlutik sanaartugassanik neqerooruteqartitsisut, tassungalu qularnaveeqqusiissutit.

Imm. 3. Inatsit imm. 2 apeqqutaatinngu ukununga atuutinngilaq:

- 1) Piginneqatigiilluni inissiat, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiatillit peqatigiiffiannut tunniunneqartut.
- 2) Namminersorluni inissialiat, Inatsisartut inatsisaannut oqaasertaliussat naapertorlugit taarsigassarsititsinissamik neriorsuuteqarfusut.

Imm. 4. Sanaartornermi suliaakkiissutissap tunniunneqarnerani inatsit imaluunniit tassani maleruagassat tunngavissatut atuutissasut neqerooruteqartitsisup ersarissumik nalunaarutigisimappagu, neqerooruteqartitsinermi suliaakkiissumillu tunniussinermi suleriaasissamut inatsimmi maleruagassat aammattaaq atuutissapput.

Imm. 5. Inatsimmi matumani maleruagassat imm. 4 malillugu atorineqartillugit, kapitali 7-imi maalaaruteqarnissamut maleruagassat tamatigut atorineqarsinnaapput.

Nassuiaatit

§ 2. Sanaartornermi suliassat tassaapput suliassat, sanaartorfimmi, illumi imaluunniit illuliami atortoqarfiliamiluunniit, suliat timitaannik aalajangersimasunik naammassisaqarnissamik siunertaqarfusut.

§ 3. Inatsimmi matumani suliariumannittussarsiuussinertut paasineqassaaq, suliassap neqeroortitsivigineqarnerani arlalinnut piffissap aalajangersimasup ataatsip iluani, aammalu neqerooruteqartitsinermi tunngavissat assigiit, imaluunniit atuuttussamik neqerooruteqarnissamut

piumasaqaatit minnerpaaffissaat ataatsimoortut, imaluunniit sanaartugassaq pillugu suleqatigiinnissamik pisussaaffiliisumik neqerooruteqarnissaq tunngavigalugit neqerooruteqartitsinertut.

Imm. 2. Tamanut ammasumik suliariumannittussarsiuussinermi tusagassiuutitigut naqitatigut imaluunniit elektronik atorlugu tusagassiuutitigut allagarsiinikkut kikkunnnulluunniit neqerooruteqarnissamut kajumissaarisoqassaaq.

Imm. 3. Killilimmik suliariumannittussarsiuussinermi toqqaannartumik, imaluunniit neqeroortikkusutat kisiisa saaffigalugit neqerooruteqarnissamut kajumissaarisoqassaaq.

§ 4. Piukkunnartussarsiorneq paasineqassaaq tassaasoq, neqerooruteqartitsisup toqqaanissamut tunngavissat ataatsimoortut tunngavigalugit neqerooruteqartussatut kissaatigineqartunik toqqaanera.

§ 5. Sinaakutissatut isumaqatigiissutitut paasineqassaaq, assersuutigalugu piffissaliussap iluani sanaartugassat assinginut sananeqarsinnaasunut akit, pitsaassutsit amerlassutsillu, imaluunniit annertussutsit eqqarsaatigalugit piumasaqaatinik isumaqatigiissusiorfusutut.

§ 6. Neqeroorutit suliariumannittussarsiuussinikkut imaluunniit sinaakutissatut isumaqatigiissusiornikkut pissarsiarineqarsimanngitsut tassaapput suliaqartinniakkat ilisimatereerlugit neqerooruteqartitsinerit.

Kapitali 2

Neqerooruteqartitsinermi pissutsit tunngaviusut

Unammilleqatigiinneq assigiimmillu pineqarnissaq

§ 7. Sanaartugassanik inatsimmi matumani ilaatinneqartunik suliaqarnissamut, imaluunniit pilersarusiornissamut suliaqarnissamullu neqeroorutit tamanut ammasumik suliariumannittussarsiuussinikkut, imaluunniit killilimmik suliariumannittussarsiuussinikkut, suliaqartinniakkalluunniit ilisimatereerlugit neqerooruteqartitsinikkut pissarsiarineqassapput.

Imm. 2. Neqerooruteqartitsisup naammaginantumik unammillersinnaalernissamut periarfissat atorluassavai.

Imm. 3. Neqerooruteqartitsisoq neqerooruteqartitsinissamik piareersaanermi ingerlatsinermilu, aammalu suliaqartitsinissamik tunniussinermi pisussaavoq, neqerooruteqartumik toqqaanermi kinaassusersiunngitsumik, piviusorsiortumik immikkoortitsiviunngitsumillu tunngaveqarnissaq, aammalu neqerooruteqartut akornanni assigiinngissitsisoqannginnissaa isumagissallugu.

Imm. 4. Neqerooruteqartitsineq atorneqarsinnaaffisigut "Kalaallit Nunaanni sanaartornermi suliaqarnissamut pilersuinemullu piumasaqaatit ataatsimoortut (AP)" imaluunniit allagartat allat pisortanit akuerisat naapertorlugit ingerlanneqassaaq.

Suliassat suliarinerini akiligassiisutaasartut

§ 8. Sanaartornermi suliassat suliarinerini akiligassiisutaasartut tamanut ammasumik neqerooruteqartitsisarnermut maleruagassanut ilaatinneqanngillat. Sanaartornermi suliaqarnissamut

suliarinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit sanaartugassaq annerpaamik 300.000 koruuninik naleqartussaattillugu taamaallaat qaqutigunnaq atorineqarsinnaavoq.

Imm. 2. Imm. 1 naapertorlugu pissutsit immikkut ittutut isigineqartut assersuutigalugu tassaapput nutarterinerit, iluarsaassinerit allannortiterinerillu annertussutsimikkut, pitsaassutsimikkut piffissamillu atuiffiusussamik siumoortumik aalajangiiffigissallugit annertuumik ajornakusoortinneqartut.

Neqerooruteqarnissamut uppersaanissamullu piffissarititaasut

§ 9. Neqeroorutip tiguneqarsimanissaanut piffissarititaasoq neqerooruteqartitsinermi najoqqutassani allassimassaaq. Neqerooruteqartussaq neqerooruteqarnissamut naammaginartumik piffissaqarsinnaasunngorlugu piffissarititaasoq sivisussusilerneqassaaq.

Imm. 2. Neqerooruteqartoq neqerooruteqartitsinermit najoqqutassani allamik allassimasoqanngippat, neqeroorutip tigunissaanut piffissarititaasup qaangiunnerani ulluni suliffiusuni 20-ni neqeroorumminik atuutsitsinissamut pisussaafeqarpoq.

Imm. 3. § 18 naapertorlugu suliariumannittussarsiuussinermi neqerooruteqartunut isumaqatiginninniarnermi, neqerooruteqartoq isumaqatiginninniarnissamut qaaqquneqanngitsoq imaluunniit isumaqatiginninniarnertit ingerlanerini peersinneqartoq, aalajangiinerup neqerooruteqartumut nalunaarutigineqarnerani erngerluni neqeroorumminut qilersorsimajunnaassaaq.

Kapitali 3

Suliariumannittussarsiuussinermi periaaseq

Neqeroorutip ilusissaa

§ 10. Suliariumannittussarsiuussinermi neqeroorutit allagaassapput. Neqeroorut atorlut elektroniskiusut atorlugit tunniunneqarsinnaapput, neqerooruteqartitsisoq siumoortumik taamaattoqannginnissaanik piumasaqarsimanngippat.

Tamanut ammasumik killilimmillu suliariumannittussarsiuussinissamik piareersaasarneq

§ 11. Tamanut ammasumik suliariumannittussarsiuussinermi neqerooruteqartitsisoq teknikkikkut aningaasaqarnikkullu pisinnaasat, neqerooruteqartup neqeroorummik naammassinissinnaasutut piukkunneqassaguni pigisassatut uppersaasagassai pillugit paasissutissanik piumasaqarpat, paasissutissat uppersaattillu taakku suussanersut neqerooqqusilluni allagarsiussami allassimassapput. Aammattaaq suliaasaq akikinnermik neqerooruteqartumut, imaluunniit aningaasaqarnikkut iluanaarnarnerpaamik neqerooruteqartumut tunniunneqassanersaq allagarsiussami allassimassaaq.

§ 12. Killilimmik suliariumannittussarsiuussinermi neqerooruteqartitsisoq tusagassiuutit naqitat imaluunniit elektroniskiusut atorlugu tusagassiuutit aqutigalugit neqerooruteqartitsinissamut allagarsiussamik tamanut ammasumik saqqummiussilluni neqerooruteqarsinnaasunut pilersaaruteqarnermigut piukkunnartussarsiorsinnaavoq. Neqerooruteqartitsinissamut allagarsiussami

allassimasussaapput

- 1) peqataanissamut soqutiginnilluni nalunaarnissamut piffissaliussaq, sivikinnerpaamik ullunik suliffiusunik 15-inik sivissuseqartussaq,
- 2) aningaasaqarnikkut teknikkikkullu pisinnaasat pillugit paasissutissat, piukkunnartussarsiornermut ilaanissamut uppersarsarneqartussat suussusissaat kiisalu taakkununga uppersarsaatissanut piumasaqaatit,
- 3) suliassaq akikinnerusumik akeqartitsilluni imaluunniit aningaasaqarnikkut iluanaarnarnerpaamik neqerooruteqartumut tunniunneqassanersoq, aamma
- 4) neqerooruteqartut neqerooruteqarnissamut kajumissaarneqartussat amerlanerpaamik qassiussanersut.

§ 13. Killilimmik suliariumannittussarsiuussinerit entreprenørit aalajangersimasut kisimik pisariaqartinneqartumik pisinnaasaqartillugit imaluunniit suliap naammassineqarnissaanut pisariaqartinneqartumik immikkut ittumik ilisimasaqartillugit, piukkunnartussarsiuussinertaqanngitsumik ingerlanneqarsinnaapput.

Suliariumannittussarsiuussinermi neqeroorutit ammarneqarnerini najuussinnaatitaaneq

§ 14. Suliariumannittussarsiuussinermi neqeroorutit sumiiffimmi suliariumannittussarsiuussiffiusumi piffissami siumut aalajangeriikkami ammarneqassapput. Neqerooruteqartut neqeroorutit ammarneqarnerini najuunnissamut, aammalu neqeroorutaasa annertussusaannik nalornissutaasimasinnaasunillu paasisaqarnissamut pisinnaatitaapput.

Tunniussinissamut tunngavissat

§ 15. Neqerooruteqartitsisup suliariumannittussarsiuussinissaq taamaatinngippagu, suliassaq ukuninnga tunngaveqarluni tunniunneqassaaq:

- 1) appasinnerpaamik akeqartitsisumut, imaluunniit
- 2) tunngavissat assigiinngitsut, soorlu akit, pitsaassuseq, piffissaq sanaffiusussaq, ingerlatsinermit aningaasartuutit, imminut akilersinnaassuseq, teknikkikkut naligititaasoq, avatangiisinut sunniutissat, sanaartugassamut titartakkat atuuffissallu, isumaqatigiisummi pineqartumi allanngorartuusinnaasut eqqarsaatigalugit aningaasaqarnikkut iluanaarnarnerpaamik neqerooruteqartumut.

Imm. 2. Tunniussinissamut tunngavissat suut atorneqassanersut neqerooruteqartitsinermi piumasaqaatini allanneqassaaq. Aningaasaqarnikkut iluanaarnarnerpaamik neqerooruteqartumut tunniussinissamut tunngavissani neqerooruteqartup tunngavissatut toqqarneqartut qanoq nalilersussanera sapinngisamik allanneqassaaq. Naliliisoqarsinnaanngippat neqerooruteqartup tunngavissat pingaarnerit suilliullugit tullerriaassavai.

Imm. 3. Neqerooruteqartup suliassaq naammaginatsumik pitsaassusilimmik, naapertuuttumik qajannaatsumillu, imaluunniit piffissaq eqqorlugu suliarsinnaanngikkai ilimanaateqarluinnarpat, neqerooruteqartitsisup neqeroorut itigartissinnaavaa.

Neqeroorutini qinigassat allat

§ 16. Neqerooruteqartitsisup neqeroorutini qinigassanik allanik neqerooruteqartut eqqarsaatigisinnaavaat, neqeroorutini qinigassani allani taakkunani neqerooruteqarnissamut piumasaqaatit minnerpaaffissaat naammassineqarsimappata.

Imm. 2. Neqerooruteqartitsisup neqeroorutit allanik qinigassartallit tiguneqarsinnaannginnerat neqerooruteqartitsinermut piumasaqaatini allassinnaavaa.

Isumaqatiginninniarnertit

§ 17. Suliassap tunniunneqarnissaanut akit minnerpaaffissaat tunngavigineqartussaappat, neqerooruteqartitsisup appasinnerpaamik akeqartitsiniarluni neqerooruteqartoq kisiat isumaqatiginninniarnertigisinnaavaa.

§ 18. Suliassap tunniunneqarnissaanut neqeroorutip aningaasaqarnikkut iluanaarnarnerpaanissaa tunngavigineqarpat, neqerooruteqartitsisup neqerooruteqartut, suliariumannittussarsiuussinermi tunngavissatut nalilikkat tulleriiaakkalluunniit tunngavigalugit aningaasaqarnikkut iluanaarnarnerpaamik neqerooruteqartut pingasut ikinnerusulluunniit isumaqatiginninniarnertigisinnaavai, neqerooruteqartitsinermi piumasaqaatini tamanna atortussaangitsutut nalunaarutigineqarsimanngippat.

Imm. 2. Neqerooruteqartitsisup isumaqatiginninniarnissaq toqqarpagu, suleriaaseq suna malinneqassanersoq kingusinnerpaamik neqerooruteqartutut toqqarneqartunut, neqerooruteqartitsisup isumaqatiginninniarnertigissallugit toqqarsimasaanut isumaqatiginninniarnertit aallartinneranni nalunaarutigineqassaaq, tamanna neqerooruteqartitsinermut piumasaqaatini allassimanngippat.

Imm. 3. Isumaqatiginninniarnertit ingerlanneqarnerini neqerooruteqartut tamarmik assigiimmik pineqarnissaat neqerooruteqartitsisup qulakkiissavaa. Pingaartumik neqerooruteqartitsisoq paasissutissanik, neqerooruteqartut ilaasa allanit pitsaanerusumik inissisimalernerinik kinguneqarsinnaasunik tunniussilluni assigiinngisitsissanngilaq. Isumaqatiginninniarnertit nalaanni neqerooruteqartut allat aaqqiissutissatut akigitassatulluunniit neqeroorutai pillugit paasissutissat § 14 naapertorlugu tamanut ammasumik saqqummiunneqareersimappata, neqerooruteqartitsisup taamaallaat paasissutissat taakku neqerooruteqartumut tunniussinnaavai.

Imm. 4. Isumaqatiginninniarnertit suliassap annertuumik allanngortinneqarneranik, imaluunniit tunniussinissamut, tassungalu ilanngullugit nalilersuinerneq tulleriiaarinissamullu tunngavissat, imm. 1 naapertorlugu isumaqatiginninniarnertifissanik toqqaanermi tunngavissatut aalajangersarneqartut allanngortinneqarnerannik kinguneqassanngillat.

Kapitali 4

Suliaqartinniakkat ilisimatereerlugit neqerooruteqartitsineq

§ 19. Neqerooruteqartitsisup suliaqartinniakkat pingasut tikillugit ilisimatereerlugit suliassamut ataatsimut neqerooruteqartissinnaavai.

§ 20. Neqerooruteqartitsisut § 1, imm. 2-mi sanaartugassanut suliaqartinniakkat ilisimatereerlugit neqerooruteqartitsisinnaangillat, matumani pineqanngippata:

- 1) sanaartugassat katillugit 500.000 koruuninik taakkuluuniit inorlugit naleqartut,
- 2) sanaartugassat aatsaat neqerooruteqartitsinermit tunngavigisat najoqqutaralugit ajornakusuungaatsiartumik aalajangiiffiqarsinnaasunik annertussuseqartut, pitsaassuseqartut piffissalernerqarsinnaasullu, soorlu misileraanerit, ilisimatusarnerit ineriartortitsinerillu, imaluunniit nutarterinerit, iluarsaassinerit allanngortiterinerillu, imaluunniit suliassat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaangitsut,
- 3) suliariumannittussarsiuussinermit neqeroorutininik naleqquttunik imaluunniit peqqussutit malillugit suliarineqartunik tiguisoqarsimannginnera, imaluunniit aallaqqaammut neqerooruteqartitsinermit piomasaaqaataasut annertuumik allanngortinneqanngippata qinnuteqaatinik tiguisoqarsinnaanginnera,
- 4) suliffeqarfik aalajangersimasooq ataaseq kisimi sanaartugassanik suliaqarnissamut periarfissaqartoq, imaluunniit
- 5) pissutsit immikkut ittut allat aalajangiisuulluinnartumik pingaaruteqartut pissutaallutik entreprenøri aalajangersimasooq toqqarneqartariaqarpat.

§ 21. Neqerooruteqartitsisup suliaqartinniakkat ilisimatereerlugit neqerooruteqartitsinermini suliassap tunniunneqarnissaanut appasinnerpaamik imaluunniit aningaasaqarnikkut iluanaarnarnerpaamik akeqartitsinissaq tunngavigineqassanersoq nalunaarutigissavaa.

§ 22. Neqerooruteqartup suliassaq naammaginartumik pitsaassusilimmik, naapertuuttumik qajannaatsumillu, aammalu piffissaq eqqorlugu suliarisinnaangikkai ilimanaateqarluinnarpat, neqerooruteqartitsisup neqeroorut itigartissinnaavaa.

Kapitali 5

Isumaqatigiissutit immersugassat

§ 23. Isumaqatigiissutit immersugassat taamaallaat isumaqatigiissuteqartut akornanni pissutsinut toqqaannartumik sunniuteqarsinnaapput. Isumaqatigiissutit immersugassat taamaallaat neqerooruteqartup ataatsip suliffeqarfiullu ataatsip akornanni isumaqatigiissutigineqarsinnaapput. Neqerooruteqartitsisup pisariaqartinneqarpat suliffeqarfik isumaqatigiissusiornissamut atugassamik neqeroorutissaminik ataatsimoortitsinissamik qinnuigisinnaavaa. Tamannali isumaqatigiissusiornermit piomasaaqaatit annertuumik allanngortinneqarnerannik kinguneqassanngilaq.
Imm. 2. Isumaqatigiissut immersugassaq sivisunerpaamik ukiuni sisamani atuussinnaavoq.

Kapitali 6

Qinnuteqartunut neqerooruteqartunullu nalunaaruteqartarnej

§ 24. Neqerooruteqartitsisup neqerooruteqartut, suliariumannittussarsiuussinermit neqerooruteqarsimasut, imaluunniit suliaqartinniakkat ilisimatereerlugit neqeroortinneqarsimasut suliakkiissutissamik tunniussinissaq eqqarsaatigalugu qanoq aalajangiisoqarsimanera pillugu sapinngisamik pilertornerpaamik nalunaarfigissavai. Suliariumannittussarsiuussinerup

taamaatinneqarnerani imaluunniit suliaqartinniakkat ilisimatereerlugit neqerooruteqartitsinermi ilisimatitsineq tamatumunnga tunngavilersuutaasunik imaqassaaq.

Imm. 2. killilimmik suliariummannittussarsiuussinermi piukkunnartussarsiuussinertalimmi, neqerooruteqartitsisup qinnuteqartut piukkunnartunut ilaanersut sapinngisamik piaarnerpaamik nalunaarfigissavai. Aamma qinnuteqartoqarneratigut neqerooruteqartitsisup qinnuteqartoq ilaatinneqanngitsoq sooq qinnuteqaatip itigartinneqarsimaneranut tunngavilersuutigisaminik nalunaarfigissavaa.

Imm. 3. Neqerooruteqartitsisup qinnuigineqarnermini neqeroorutip itigartinneqarneranut tunngaviusoq neqerooruteqartunut kalluarneqartunut § 14, imm. 3 aamma § 22 naapertorlugit nalunaarutigissavaa, tunngavilersuut § 25, imm. 2 naapertorlugu nalunaarutigineqareersimanngippat.

§ 25. Aningaasaqarnikkut iluanaarnarnerpaamik neqerooruteqarnissaq tunngavigineqarsimappat, aamma imm. 2-4-mi maleruagassat atuutissapput.

Imm. 2. § 18 naapertorlugu isumaqatiginninniarnarit aallartinneqarnerinut peqatigitillugu, neqerooruteqartitsisup neqerooruteqartut kalluarneqartut isumaqatiginninniarnernut qaaqquneqartussaanginnerannik aalajangiineq tamatumunngalu tunngavilersuutaasoq pillugu nalunaarfigissavai.

Imm. 3. § 18 naapertorlugu isumaqatiginninniarnarit naammassineranni, neqerooruteqartitsisup neqerooruteqartut, neqerooruteqartup isumaqatiginninniarnarfissatut piukkussimasani neqeroorummi aalajangiunneqartumi piginnaasat annertuumillu iluaqutissat nalunaarutigissavai.

Imm. 4. § 18 naapertorlugu isumaqatiginninniartoqarsimanngippat, imaluunniit neqeroorutit suliaqartinniakkat ilisimatereerlugit neqerooruteqartitsinikkut pissarsiarineqarsimappata, neqerooruteqartitsisup qinnuteqartoqarneratigut neqerooruteqartunut, neqerooruteqarnissamut piumasaqaatinik naammassinnissimasunut, neqeroorummi aalajangiunneqartumi piginnaasat annertuumillu iluaqutissat nalunaarutigissavai.

Kapitali 7

Suliariumannittussarsiuussinerit il.il. pillugit maalaarutit

§ 26. Neqerooruteqartitsisarnermut Maalaaruteqartarfimmik, neqerooruteqartitsinerni maalaarutininik suliaqartartussamik suliaasaqarfiit arlaannaannulluunniit attuumassuteqanngitsumik Naalakkersuisut pilersitsisinnaapput.

Imm. 2. Neqerooruteqartitsisarnermut Maalaaruteqartarfik ataatsimik siulittaasoqassaaq aammalu sulianut ilisimaarinnittunik marlunnik ilaasortaqaassalluni, taakkulu ukiuni sisamani atuuttussanngorlutik qinigaqqissinnaatitaallutillu toqqarneqartassapput.

Imm. 3. Kalaallit Nunaanni Landsdommerip Neqerooruteqartitsisarnermut Maalaaruteqartarfiup siulittaasussaa, aammalu taassuma sinniisissai ataaseq arlallilluunniit, inatsilerinermi atorfilltut soraarummeersimasussat toqqassavai. Siulittaasup taassumalu sinniisissaasa toqqarneqarnerani, sapinngisamik eqqartuussisunut fuldmægtigimik toqqaanermi piginnaanerisassat misilittakkatigullu tunngavissat assingi atorneqassapput.

Imm. 4. Kalaallit Nunaanni sanaartornermik suliaqartut inassuteqarnerisigut, Naalakkersuisut

ilaasortassanik sulianik ilisimasalinnik marlunnik kiisalu taakkununga sinniisissanik arlalinnik, tamarmik sanaartornermut ilisimasaqartuusussanik toqqaasassapput.

§ 27. Neqerooruteqartitsisarnermut Maalaaruteqartarfik inatsimmi matumani aalajangersakkanik, taakkulu malillugit maleruagassianik unioqqutitsinerit pillugit apeqqutinik suliaqartassaaq.

Imm. 2. Neqerooruteqartitsisarnermut Maalaaruteqartarfiup pissutsit imm. 1-imi taaneqartut pillugit maalaarutinit aalajangiineri, sapinngisamik maalaarutip Neqerooruteqartitsisarnermut Maalaaruteqartarfimmut saqqummiunneqarneraniit sapinngisamik kingusinnerpaamik qaammatit pingasut qaangiunnerini pisassapput.

Imm. 3. Naalakkersuisut allatseqarnikkut Neqerooruteqartitsisarnermut Maalaaruteqartarfimmut ikiorsiisassapput, kiisalu Inatsisartuni Naalakkersuisunilu il.il. akissarsiat il.il. pillugit Inatsisartut inatsisaat naapertorlugu maalaaruteqartarfiup ilaasortaasa akissarsiaqartinneqarnissaannut maleruagassanik aalajangersaasassallutik.

Imm. 4. Neqerooruteqartitsisarnermut Maalaaruteqartarfik sulinini pillugu ukiumoortumik Naalakkersuisunut nalunaarusiortassaaq.

§ 28. Suliassaq allakkatigut ilanngussanik agguaaqatigiinnikkut piareersarneqartassaaq, tamatumalu kingorna siulittaasoq allamik aalajangiingippat oqaluinnarluni isumaqatiginninniutigineqartassalluni.

Imm. 2. Neqerooruteqartitsisarnermut Maalaaruteqartarfiup suliame illuatungeriinnit paasissutissat imaluunniit pissutsit Maalaaruteqartarfiup oqarsinnaatitaaffigisaanut ilaasut pillugit aalajangiinerit sulinermini pisariaqartutut isumaqarfigisani tamaasa piumasarisinnaavai.

Imm. 3. Neqerooruteqartitsisarnermut Maalaaruteqartarfiup oqaaseqaateqartinneqareerneratigut maalaaruteqartarfiup suleriaasissaa aammalu maalaaruteqartarfiup sulineranut maleruagassat sukumiisut Naalakkersuisunit aalajangersarneqassapput, taakkunungalugu maalaarutinit tunniussinermit sullissinerit akillu, suliap akiata 1 procentianik annertussuseqartut, annerpaamilli 100.000 koruuniusussat, aamma aalajangiinernik tamanut saqqummiussisarnerit ilaapput. Maalaaruteqartoq maalaarumminut taparserneqarpat, imaluunniit suliaq Neqerooruteqartitsisarnermut Maalaaruteqartarfimmi suliarineqarnissaminut naleqqutinnigitsutut nalilerneqarluni itigartinneqarpat akiliut utertinneqartassanersoq pillugu Naalakkersuisut maleruagassanik erseqqinnerusunik aalajangersaasinnaapput.

Imm. 4. Neqerooruteqartitsisarnermut Maalaaruteqartarfiup suliame suliarineqarnerminni 100.000 koruunit inorlugit akeqartut suliarsinnaangilai.

§ 29. Uku maalaaruteqartarfimmut maalaarumminnik tunniussisinnaapput:

- 1) kikkulluunniit inatsisit tunngavigalugit tamatumunnga soqutiginnittut,
- 2) Unammilleqatigiinnermut Ataatsimiititaliaq, kiisalu
- 3) kattuffiit pisortanilu oqartussaasut, Naalakkersuisut maalaaruteqarnissamut akuerisaat.

Imm. 2. Maalaaruteqartarfiup inuk alla imaluunniit pisortani oqartussaasoq, suliame annertuumik pingaaruteqartoq, suliakkiisumut maalaarutigineqartumut iluaqutaasinnaasoq suliame suleqataanissaanut akuerisinnaavaa.

Imm. 3. Kingusinnerpaamik maalaarutip maalaaruteqartarfimmut tunniunneqarneranut peqatigitillugu, maalaaruteqartoq suliakkiisumut unioqqutitsinermut patsisigineqartoq, aammalu maalaarutip

maalaaruteqartarfimmut tunniunneqarsimanera pillugu allakkatigut ilisimatissavaa.

Imm. 4. Neqerooruteqartitsinerup inernerata neqerooruteqartumut nalunaarutigineqarneraniit, maalaarummik Maalaaruteqartarfimmut tunniussinissamut piffissarititaasoq sapaatit akunnerinik sisamanik sivilissuseqarpoq.

§ 30. Maalaarut aatsaat, maalaaruteqartarfiup imaluunniit maalaaruteqartarfik sinnerlugu siulittaasup maalaaruteqartup piumasaqarneratigut tamatumunnga aalajangiippat atuuttussaatinneqarsinnaavoq.

Imm. 2. Maalaaruteqartoq maalaarummi maalaaruteqartarfimmut suliaakkiissutigisamini tamakkiisumik ilaannaasumilluunniit taparserneqarsimatillugu, pissutaasut tunngavigalugit maalaaruteqartarfiup suliaakkiisoq maalaaruteqartup maleruagassanik inatsimmi matumani taaneqartunik, aammalu maleruagassanik taanna tunngavigalugu suliarineqarsimasunik unioqqutitsinerup kingunerisaanik annaasaanut taarsisussanngortissinnaavaa.

§ 31. Maalaaruteqartoq maalaarummi maalaaruteqartarfimmut tunniussamini tamakkiisumik ilaannaasumilluunniit taparserneqarpat, maalaaruteqartarfiup neqerooruteqartitsisoq maalaaruteqartup maalaarummi suliamut atatillugu aningaasartuutigisimasaanut akileeqqullugu piumaffigisinnaavaa.

§ 32. Maalaaruteqartarfiup aalajangiineri allaffissornermi oqartussaasumut allamut ingerlateqqinneqarsinnaanngillat.

Imm. 2. Maalaaruteqartarfiup aalajangiinerinut atatillugu aalajangiinerup pineqartumut nalunaarutigineqarnerata kingorna, kingusinnerpaamik sapaatit akunnerisa arfineq pingasut qaangiunnerini eqqartuussivinnut suliaakkiissutigineqarsinnaapput. Piffissarititaasup iluani suliaakkiisoqanngippat, maalaaruteqartarfiup aalajangiineri inaarutaasumik aalajangiinerussapput.

§ 33. Piaaraluni imaluunniit mianersuaalliorujussuarluni paasissutissanik eqqunngitsunik paatsoortitsisinnaasunilluunniit Neqerooruteqartitsineri Maalaaruteqartarfimmut tunniussisoq, imaluunniit paasissutissanik suliamut pineqartumut pingaarutilinnik nipangiussisoq, imaluunniit Neqerooruteqartitsineri Maalaaruteqartarfiup inerteqqutaanik peqqussutaanilluunniit naammassinninngitsoq akiliisussanngortinneqarsinnaavoq.

Imm. 2. Unioqqutitsisoq suliffeqarfiuppat tamakkiisumik ilaannaasumilluunniit naalagaaffimmit, Namminersorlutik Oqartussanit, kommunimit imaluunniit kommunit suleqatigiiffianit, aktiaatileqatigiiffimmit, anpartsselskabimit, andelsselskabimit assigisaannilluunniit pigineqartoq, suliffeqarfik il.il. tassunga akisussaatinneqarsinnaavoq. Taamatuttaaq unioqqutitsineq Namminersorlutik Oqartussanit, kommunimit imaluunniit kommunit suleqatigiiffianit piliarineqarpat tamanna atuutissaaq.

§ 34. § 28, imm. 2 naapertorlugupaasissutissanik Neqerooruteqartitsineri Maalaaruteqartarfimmut tunniussinngitsoortoqarpat, maalaaruteqartarfik pineqartut ullormoortumik akiliisussanngortitsinerisigut pinngitsaaliisummik akiliisissinnaavai, taakkulu sioqqutsisumik eqqartuussinertaqanngitsumik pinngitsaaliisummik naammassitinneqarsinnaapput.

Kapitali 8

Aalajangersakkat allat aamma atuutilerfia

Ilinniartut

§ 35. Sanaartukkat § 1, imm. 2-mi pineqartut suliarineqarnerinut atatillugu ilinniartut qanoq amerlatigisut atorfinitsinneqartarnissaannik Naalakkersuisut maleruagassiorsinnaapput.

Atortuulersinneqarfia il.il.

§ 36. Inatsit 1. januar 2010-mi atuutilerpoq, piffissamillu tassanngaanniit suliassanut neqerooruteqartitsivigineqartunut atuutilerluni.

Imm. 2. Tamatuma peqatigisaanik suliariumannittussarsiuussisarnermut il.il. Inatsisartut inatsisaat nr. 3, 6. april 1992-imeersoq atorunnaarsinneqarpoq.

Imm. 3. Illuliassanut sanaartugassanullu neqeroortitsisarneq pillugu Namminersornerullutik Oqartussat nalunaarutaat nr. 15, 5. juli 2007-imeersoq atorunnaarsinneqarpoq.

§ 37. Pituffimmi sakkutooqarfik inatsimmi matumani aalajangersakkanut ilaatinneqanngilaq.

Namminersorlutik Oqartussat, ulloq 2. december 2009

Kuupik Kleist

/

Jens B. Frederiksen

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut

